

## «Imi buka saída? ...Imi mai no haree» (Jo 1,35-39)

### Introduziane

João Batista nia eskolante rua “la’o tuir Jezús’. Verbu ne’e indika hilin presizu ida iha moris: sira hakarak sai Jezús nia eskolante. Epizódiu enkontru nian se haree liu de’it parese baibain de’it. Maibé se ita haree ho atensaun ita bele komprende katak espresaun ida-idak iha signifikadu ida. Liafun sira «Imi buka saída?», ne’ebé Jezús soe derepente, define sira na’in rua nu’udar “ema ne’ebé buka”. Resposta ne’ebé sira fó mós hatudu katak buka duni: «Mestre, ita hela iha-ne’ebé?». Sira la uza título boboot ne’ebé João Batista uza, tanba sira hakarak estabele kedas ho Jezús relasaun Mestre-eskolante. Atu bele to’o ba ida-ne’e, sira presiza hatene Jezús horik iha ne’ebé. Defaktu, Mestre, iha ambiente ne’ebá nian, la’ós ida-ne’ebé hanorin konseitu ruma, maibé ida-ne’ebé hanorin modu ida moris nian. Atu sai eskolante indispensável liu iha komuñan moris nian.

Jezús simu sira-nia lia-husu no dehan: «Imi mai no haree». Haree ida-ne’e mak komponente indispensável ba formasaun eskolante nian.

### Testu

<sup>35</sup>Liu tiha loron ida, João hamutuk hela ho nia eskolante na’in rua. <sup>36</sup>Wainhira hare Jezús ne’ebé liu dau-daun, nia dehan: “Maromak nia Bibi-Oan mak ne’e!” <sup>37</sup>Rona tiha lia hirak ne’e, eskolante na’in rua ne’e tuir Jezús. <sup>38</sup>Hare sira tuir Nia, Jezús fila hodi husu ba sira: “Imi buka saída?” Sira hatan: “Rabbi, katak Mestre, ita hela iha ne’ebé?” <sup>39</sup>Jezús dehan: “Imi mai no hare.” Sira bá duni, hodi hare Nia horik iha ne’ebé. Loron ne’e duni sira hela ho Nia kala suku haat loraik.

### Leitura

v. 35. *Liutiha loron ida*. João nia evanjellu hahú ho semana ida inaugurasan nian (haree 1, 29.35.43) ne’ebé karik evanjelista tanesan ho loron hitu kriaun nian. Jezús hahú kriaun foun.

v. 36. *Mak ne’e*. João Batista la’ós de’it ida-ne’ebé haklaken Kristu, nu’udar profeta sira; nia mak ida-ne’ebé hatudu; hodi hatudu ba ninia eskolante sira ida-ne’ebé sira tenke tuir, nia heli an.

*Maromak nia Bibi-Oan*. Ne’e mak título istória nian. Ba Batista nia eskolante sira, natoon de’it rona liafuan ida-ne’e atu tuir Jezús. Sira rekoñese iha ne’e apelu mesiániku ida.

v. 38. *Imi buka saída?*. Ida-ne’e mak tuir João nia evanjellu Jezús ko’alia ba dala uluk. Jezús sei formula lia-husu ne’e dala rua tan, hodi tau iha sentru ninia an rasik, no nafatin iha momentu esensial sira: Paixan no bainhira mosu ba Maria Magdalena. Lahó atitude makbukak nian fiar labelek. Profeta no matenek na’in sira ne’ebé Bíblia haktuir konvida ho insistência atu «buka» Na’i.

*Rabbi*. Evanjellu dahaat fó ba Jezús título Rabbi nian ba dala ualu. Ida-ne’e atu dehan katak hakbesik ba Jezús atu koñese ninia hanorin, hanesan bainhira Nikodemus hakbesik nia hodi hanaran Rabbi.

*Ita hela iha ne’ebé?*. Buat ne’ebé importante la’ós hatene iha ne’ebé Jezús nia fatin hela bá. Lia-husu esensial ne’ebé husi hahú kedas ita haree iha prólogu mak hatene Jezús nia fatin iha ninia relasan ho

nia Aman. Elementu ruma resposta nian sei fó iha «oras ne'ebé Jezús sei hakat husi mundu ne'e ba Aman» (13,1).

39. *Imi mai no haree*. Iha ne'e la ko'alia kona-ba fatin Jezús hela bá. Buat ne'ebé esesnsiál kona-ba nia la'ós objetu esplikaun nian, maski Jezús rasik esplika. Presiza tuir nia no haree nia manifesta nia an. «Mai no haree Maromak nia obra sira» (Salmu 66,5). Jezús nia resposta, ne'ebé troka argumentu hotu,loron ida Filipe sei foti fali (1,46) nune'e mós feto samaria nian (4,29).

*Tuku haat loraik*. Hatudu oras ho modu presizu ne'e karik atu dehan katak momentu ne'e mak momentu desizivu ida.

### **Meditasaun**

João Batista lori ninia eskolante sira atu iha enkontru pesoál ho Kristu no dudu sira atu tuir nia (Jo 1). Buka Maromak nia hakaran presiza mediasaun umana: presiza 'mestre sira', katak ema ne'ebé iha kapasidade atu halo no sai sinál, ho kapasidade atu orienta ema ida ninia dalan; no 'aman-inan sira', katak ema sira ne'ebé iha kbiit atu hahoris moris tuir Espíritu. Ita labele tatoli fiar tuir dalan intelektuál, maibé iha relasaun umana nia laran. Iha relasaun paternidade/maternidade espírituál nia laran la'ós esensiál buka ema ida «extraordinaria» nu'udar gia, maibé sai fiél ba ida-ne'ebé ita hili ona. Dalabarak «oan» nia fidelidade mak hahoris «aman/inan». Inan/aman espírituál mak ema ida ne'ebé haraik an, ne'ebé la babeur, la dada ba nia an rasik, la kesi metin eskolante ba ninia an, maibé eduka nia, lori nia ba adezaun teologlál, sai mestre liberdade nian hodi gia ema ba relasaun pesoál no furak liu ho Na'i. Nia mak ema ida konxiente kona-ba importánsia limite nian, ne'ebé hatene tau limite ba ida-ne'ebé nia gia no nia rasik respeita. Maibé la'ós tanba nia an rasik maibé ba Na'i, mak nia bele tulun ema seluk atu moris ba Na'i no liberta nia an husi vontade rasik.

João, hodi hatudu Jezús ba ninia eskolante sira nu'udar Maromak nia Bibi-oan, defaktu, sujere ba sira dalan ne'ebé sira tenke tuir no sai protagonista ba relasaun sakramentál. Enkontru ho nia lori ba Kristu. Ida ne'e mak sasin furak liu liberdade nian ne'ebé tau iha krize fiar ne'ebé redús de'it ba serbí Kreda ka ba empenhu pastorál ka, aat liután, ba dedikasaun ka serbí leader karizmátiku ida ka ida-ne'ebé pretende nia an nu'udar leader.

«Imu buka saída?» (Jo 1,38). Jezús nia liafuan ba eskolante rua ne'ebé hahú kedas atu tuir nia mak lia-husu ida mai ita ohin. Kualidade esensiál sarani ida nian mak defaktu "quaerere Deum", "buka Maromak": sarani ida la simu bolun atu sai militante iperativu, maibé makbukak Maromak nian. La'ós ida-ne'ebé hatene hotu ona kona-ba Maromak, maibé ida ne'ebé husi mistériu sira Maromak nian, rekoñese no konfessa iha Kristu, lori nia atu hafoun ninia hahalok buka nian no ninia domin. Iha tempu ne'ebé subliña liután mak «espírituál» liufali «fiar» (sentralidade iha Kristu), importante tebes purifika, sai husi an rasik no tau iha sentru buka nian no *sequela* nian Kristu rasik. Jezús nia lia-husu ne'ebé halo ita tama kle'an iha ita-nia motivasaun sira, atu bele sai klaru liután katak Jezús ne'ebé ita tuir mak Bibi-Oan, Atan, hedi iha krús, no katak dalan ne'ebé ita tuir mak dalan Bibi-Oan nian «ba fatin hotu nia bá» (Ap 14,4),to'o rohan, to'o krús, to'o mate.

«Ita hela iha ne'ebé?», ka di'ak liu «Ita horik iha ne'ebé?». Ida-ne'e mak lia-husu ne'ebé eskolante sira uza atu hatán ba Jezús nia lia-husu. Iha ne'ebé ita-nia "iha-ne'ebé?" Iha-ne'ebé mak ita hetan solidés no estabilidade? Jezús horik iha Aman, iha ninia liafuan, iha ninia domin. No eskolante sira simu bolun atu tuir dalan hanesan: hela iha Oan-Mane ninia liafuan no domin atu horik iha Maromak. Nu'udar sarani buat ne'ebé ita buka lori ba vida interiór, ba dimensaun kle'an komuñau ho Aman, Oan no Espíritu. Jezús ninia «iha-ne'ebé» mak Aman: hodi tuir Jezús, ida-ne'e sai mós eskolante nia «iha-ne'ebé» («Ema ne'ebé serbí Ha'u, sei tuir Ha'u; no iha fatin ne'ebé Ha'u hela, Ha'u atan mós sei hela ne'ebá» Jo 12,26). Halo nune'e fiar nakfilak ba espeirénisa Na'i ninia horik iha fiar-na'in nia moris.

**Katuir dixipuladu nian :**

Haree mestre, katak rekoñese Jezús nu'udar Mesias, Maromak nia Oan.

Horik ho Nia, estabelese komuñau ho Na'i.

Sasin, katak simu tiha bolun hakarak fahe ho ema seluk esperiénsia ne'e.